

10. marts 2015

UPA 2015/73

Uunga siunnersuut: Umiarsualiviit pillugit Inatsisartut inatsisaat nr. xx, xx. xx 2015-imeersoq.
(Ineqarnermut, Sanaartornermut Attaveqaqatigiinnermullu Naalakkersuisoq)

Umiarsualiviit pillugit Inatsisartut inatsisissaat Naalakkersuisuniit saqqummiunneqartoq Siumumiit imatut oqaaseqarfigissavarput.

Nunatta ataatsimoortinneqarneranut angallanneq assartuussinerlu ataqatigiittariaqarput isumannaat-suusariaqarlutillu. Taakkunungalu attuumassuteqarluinnarput nunatsinni umiarsualiviit pitsaasu-nissanut isumannaatsuunissanullu sinaakkutit, taamaattumik umiarsualiviit pillugit inatsisissaq manna Siumumiit iluarisimaaratsigu oqaatigissavarput.

Nunatsinni assartuussinikkut sullinneqarnikkut sapinngisamik eqaatsumik pitsaasumillu ingerlaso-qarnissaa tamatta inuiaqatigiit soqutigisaraarput soqutigiuartariaqarlugulu. Nunarpummi angisoo-rujussuuvoq inukitsunnguullunilu, illoqarfiit nunaqarfiillu imminnut qanittuunngillat aqqusine-qaranilu, taamaattumik pinngitsoorani immakkut tamatigit assartuisarnissaq sumiiffinni tamani pisari-aqarpoq pisariaqartuartaallaallunilu. Taamaattumik umiarsualiveqarnikkut inatsisitigit pitsaasumik inissisimanissaq inuiaqatigiinni pingaaruteqarpoq, tamannalu aamma uani inatsisissami siuner-tarineqarmat Siumumiit maluginiarparput.

Inatsisissatut siunnersuummi ilaatigit qulakkeerniarneqarput umiarsualiveqarfiit Namminersorlutik Oqartussanit pigineqartut inuiaqatigiinni pisariaqartitat aallaavigalugit pitsaanerpaamik sinaakku-sernissaat, tamakkualu inuiaqatigiit ingerlatitaaneranni pingaarluinnartut tassaallutik usinik tigoo-raaneq nassiussuinerlu, aalisarnermik inuussutissarsiuteqartut sullinneqarnerat kiisalu umiarsuarti-gut ilaasunik angallassisut sullinneqarnerat.

Inatsisissatut siunnersuummi ilaatigit aamma periarfissaalissaaq innuttaasut, inuussutissarsiortut kiisalu kommunit umiarsualivinnik ingerlatseqatigiiffiliorsinnaangornerat. Tamanna soorunami inuiaqatigiinni inuussutissarsiornikkut ineriartornissamut pitsaasumut ingerlariarnissamut tikkuussi-sutut Siumumiit isumaqarfigaarput.

Taamatuttaaq umiarsualivinnik atuisut akiliuteqartinneqartalermissaat inatsisissatigit tunngavissin-riarneqarpoq, Siumumiillu tamassumap innuttaasunut akitigit nammakkersuutaanngitsumik inissin-nessaata qulakkeerneqarnissaa Ataatsimiititaliami nalilersorluarneqarnissaa inassutigaarput.

Taamaattorli akigititat tamarluinnaasa Naalakkersuisunit akuersissutigineqaqqaartarnissaat Siumumiit ilalernartipparput, tassami atuisut, tassalu nunatsinni inuiaqatigiit akilersinnaasaaminnik assartuinikkut akiliuteqartin-neqartarnissaat periarfissaajuartariaqarmat.

Nunatsinni inuussutissarsiutit pioreersut inuussutissarsiutaalerumaartussallu eqqarsaatigalugit umi-arsualivitsigit ineriartortitsinissaq pingaaruteqarluinnarpoq. Aalisarneq, aatsitassarsiorneq, takor-nariaqarneq, angallanneq kiisalu inuussutissarsiutit allat pitsaasumik ineriartornikkut kiffar-tuunneqassappata umiarsualivitsigit pitsaasumik inatsisitigit sinaakkusiinissap pingaaruteqassusia Siumumiit oqaatigerusupparput.

Taamatut oqaaseqarluta inatsisissatut siunnersuut una taperserparput Sanaartornermullu ataatsimiititaliamut aappasaaneerisoqartinnagu ingerlatinneqarnissaa innersuussutigalugu.

Anders Olsen
Siumut